

Powšitkowne WOZJEWJENJA

njedźelu, 1. měrca 2020

Póstne seminary w Smochćicach

„Swětlownja abo narowny pomnik Boha“ rěka hłowna tema lětušich póstnych seminarow w Smochčanskim Domje biskopa Bena. Póndźelu, 2. měrca, rěka tema „Kmane jenož k njedźelnym narěčam? Wjesole poselstwo a jeho hódnoty“. Referentaj budžetaj Ansgar Hoffmann z Budyšina a Tobias Petzoldt z Moritzburga. Tydžeń pozdžišo, póndźelu, 9. měrca, změjjetaj Gregor Giele z Lipska a Tilmann Popp z Budyšina zawodne słowa k temje „Nowe wino w starych hadźicach? Wjesole poselstwo a jeho šansy w přichodze“. A póndźelu, 16. měrca, porěči Thomas Arnold z Drježdžan k temje „Křescenjo mjenuja so wšitcy? Wjesole poselstwo a jeho zastupjerjo w towaršnosći“. Seminary, kotrež zahaja so stajnje w 19.30 hodž., zarjaduje Dom biskopa Bena w kooperaciji z Ewangelsko-lutherskim cyrkwiskim wobwodom Budyšin-Kamjenc, z Budyškim dekanatom a z Towarstwom Cyrila a Metoda z.t.

Zhromadny dzeń za šulerjow 3. do 5. lětnika

Dekanatne dušepastyrstwo za dźěći přeprašuje šulerjow 3. do 5. lětnika na zhromadny dzeń, na kotrymž budu so z cyrkwiskim lětom zaběrać. Tón wotměje so sobotu, 14. měrca, wot 9 do 15 hodž. we Worklečanskim Don Boskowym domje. Zajimcy njech so prošu hač do wutory, 10. měrca, pod telefonowym čisłom (03 57 96) 8 87 07 we Worklecach přizjewja. Za wudawki dnja zběra so wot kóždeho wobdźělnika přinošk we wysokosći štyrjoch eurow.

Wječorne modlenje młodžiny

Dekanatna młodžina zetka so přichodnu sobotu, 7. měrca, w 20 hodž. w Chrósćicach k zhromadnemu wječornemu modlenju wespery. Po tym wobhlada sej film „Papst Franziskus – Ein Mann seines Wortes“. Dalše zhromadne modlenje wespery budže sobotu, 21. měrca, w 19 hodž. w Budyskej Montessorijowej zakładnej šuli na Tzschirnowej 12.

Duchowna hudźba k póstnemu časej

Jako zazběh do póstneho časa zaklinči tutu njedźelu, 1. měrca, we 18.00 hodž. w Budyskej serbskej cyrkwi Našeje lubeje knjenje twórba „Ow hłowa, krawa zbita“ wot Johannesa Gottlieba Janitscha (1703–1763) ze smyčkowym kwartetom „Cordophone“. Wón zahraje dale twórby pólsko-francoskeho komponista Aleksandra Transmana, ale tež Detlefa Kobjele, Feliksa Brojera a Johanna Sebastiana Bacha. Wšitcy su wutrobnje přeprašeni. Zastup je darmotny, prosy pak so wo dar do kolekty.

Předstajenja hry Bratrowstwa

Dźiwadłowa skupina Kulowskeho Bratrowstwa předstaji swoju žortnu hru „Namrěwstwa dla zawrjene“ sobotu, 7. měrca, w 16 hodž. w Bukecach, njedźelu, 8. měrca, w 17 hodž. w Nowoslicach a njedźelu, 15. měrca, w 17 hodž. w Haslowje. Poslednje předstajenje budže njedźelu, 22. měrca, w 17 hodž. w Kulowje.

Putniska jězba w juniju do Pólskeje

Po slědach bamža Jana Pawoła II. powjedže putniska jězba wot soboty do pjatka, 6. do 12. junija, do Pólskeje. Wopytamy Wadowice, Zakopane, Częstochowu, Warszawu a Licheń. Nadrobniše informacije dóstanu zajimcy pod telefonowymaj čisłomaj (01 63) 7 33 82 05 abo (03 57 96) 9 54 28 (po 19 hodž.) abo pola mje w Hórkach, Sydlišćowy puć 2. Maćij Hadank

Putniska jězba w oktobru do Pólskeje

Dalšu jězbu po slědach swjateho Jana Pawoła II. zarjaduje Smochčanski Dom biskopa Bena wot soboty, 17. oktobra, do pjatka, 23. oktobra. Planowany je wopyt Krakowa, wopomnišća koncentraciskeho lěhwa Auschwitz, Wadowic, Noweje Huty a Częstochowy. Rektor Sebastian Kieslich budže jězbu nawjedować a farar dr. Michael Kleiner duchownje přewodžeć. Přizjewjenja přijimuju w Domje biskopa Bena telefonisce pod čisłom (03 59 35) 2 23 15 abo z mailku na sekretariat@benno-haus.de.

Do „Božeje zahrody“ a wokoliny

Ze Šmitec wozydłownistwom přeprašuju na putniku jězbu wot štwórtka do póndžele, 30. julija do 3. awgusta, do tak mjenowaneje „Božeje zahrody“. W bazilice Vierzehneiligen wobdžělmy so na putniskich kemšach. Zastanjemy tohorunja w Bayreuce a wopytamy tam mjez druhim synagogu. W Bambergu wobhladamy sej biskopsku cyrkej a město, zeznajemy mošeju a změjemy tež swobodny čas. Nimo toho steja Bad Staffelstein, Lichtenfels a klóšter Banz na programje. T. Kubašec

Terminy lětušich putnikowanjow do Medžugorja

Gerat Róbl ze Smjerdžaceje přeprašuje tež lětsa zaso na putnikowanja do Medžugorja. Termíny jězbow – stajnje wot soboty do soboty – su: wot 28. měrca do 4. apryla, wot 5. do 12. septembra, wot 17. do 24. oktobra a wot 24. do 31. oktobra. Zajimcy měli so pola Gerata Róbla přizjewić, telefonowe čisło (03 57 96) 9 65 40.

„Mjenje stresa – wjace wjesela“

W Smochčanskim Domje biskopa Bena ma so w pjatym tydženju lětnich prózdnin wot soboty do soboty, 15. do 22. awgusta, swójbny tydžeń pod temu „Mjenje stresa – wjace wjesela“ wotměć. Staršim z džěćimi wot třoch lět poskićuja tam móžnosć, we wšelakich seminarach nastorki za wšědny džeń w swójbje dóstać. Při tym póndže wo respektny kubłanski stil, wo wid na potrěbnosće džěći a młodostnych kaž tež wo to, na kotre wašnje móhli starši na mylace wašnja zadžerženja wotpowědnje reagować. W času seminarow za staršich změja džěći swójsku zaběru. Kubłanske dny wobsahuja tohorunja pisany wólnočasny program. Nadrobne informacije dóstanu zajimcy w Smochćicach pod telefonowym čisłom (03 59 35) 2 23 17.